

Nembiak ke baru graduet deka agi gawa ba sektor peribit



Utusan Borneo (Sarawak) 23 Jun 2016

KUCHING: Gawa ba sektor peribit popular dipilih rayat Sarawak ti baru nembuka pelajar ba renggat pelajar tinggi.

Bepelasarkan pansik ti dipejalaika SarawakJobs.com. 'Laporan Kaji Selidik Gaji 2015-2016', ari 2,385 iku nembiak tauka responden ari 18 institut pelajar tinggi di negeri ru, lebih 70 peratus milih ba sektor peribit.

Pansik ti dipejalaika nengah 'online' nya mungkur 910 iku pengereja pengawa menua tu ti dipejalaika dalam timpuh enam bulan iya nya ari Jun nyentuk Disember 2015.

"Tiga ari tetiap empat iku nembiak ti diinterbiu tauka lebih

70 peratus ari 2,385 iku nembiak ke dipansik milih gawa ba sektor peribit enda ngira sekalika organisasyen besai, jalan pemesai enggau mikro.

"Lalu urung 30 peratus agi deka gawa enggau perintah sekalika perintah negeri tauka perintah besai," pia ku ripot nya.

Kelimpah ari nya,10 rintai pengawa ke dipilih mayar gaji berengkah ari RM2,191 nyentuk RM3,161.

Sepuluh rintai pengawa ke dipilih raban graduet di negeri tu iya nya injiniring , akaun (kewangan tauka perbankan), dagang (servis profesional), pelajar (latih), gawa kediri, dagang

temuai & raun neres menua, arkitek (seni, kreatif, komunikasi), komputer (teknologi pemadah), perintah (nengeri, besai) enggau dagang (dagang, komunikasyen).

"Faktor gaji ke besai agi dibayar sektor injiniring nyadika kebuah raban graduet milih sektor nya.

"Nitihka gaji purata ti diulih nengah pansik ke mungkur bala pekereja, raban graduet deka ngiga pengawa dalam sektor injiniring laban ngarapka dibayar gaji belabuh ari RM2,191 nyentuk RM3,151 (sebulan)," ku ripot nya.

Ripot pansik nya mega beratika pekereja indu suah agi

dibayar gaji ke baruh agi dibanding enggau pekereja lelaki taja pan ngembuan tikas pelajar ke sebaka.

Bida besai gaji antara gender kelebihan agi ba pekereja indu ti udah ngambi peresa Sijil Persekolahan Tinggi Malaysia (STPM) tauka sama bulih RM270 lebih kurang ari tetiap RM1,000 ti diulih pekereja lelaki.

Taja pia,bida gaji nitihka gender deka majak mit enti tikas pelajar manggai ba tikas diploma, ijazah sarjana mudaenggau sarjana.

"Pekara ti nengenyitka kami ari pansik tu iya nya, orang indu ti ngembuan ijazah sarjana muda dibayar peny ampau gaji ke nyauka sebaka enggau pekereja lelaki lalu semina bisi bida dua peratus aja," ku ripot nya.

Reti nya, bida gaji nitihka gender deka nyadi belama nyauka ba semua renggat pelajar enggau tikas pelajar tau meri pangka ba gaji ti bepelasarka gender.

Bida gaji nitihka gender ukai semina jerita aja, patut bisi orang ngaga utai ti tau ngubah nya.